

ЛҮИМА СЭРИПОС



www.khanty-yasang.ru

Общественно-политическая газета

E-mail: luima@ugracom.ru

4 апреля
2014 года
№7
(1073)



В. Узель ва́румхури

Ты хурит Людмила Мелентьева осханты Ёква пёсым олэг. Людмила «Старый Сургут» музейт рупиты. Ты ётпост Ханты-Мансийск устханты османьши махум йиквуңкв ханищтавёсыт. Ты урыл мотыт газетат ловиньтэн.

Ты
номерыт
ЛОВИНЬТЭН:

Тәл сыс сав
ёмас тәла
вәрвес

3

Соссаң
нэт-хумит
кассыт

5

«Ўринэква
хотал»
янытлавес

8

Сәлың колт
яласан
хум

13

Йильпи тәлн
йильпи
НОМТЫЛ

16

ЛЯХХАЛЫТ



Округувт хус тал сакконыт хансавет

Ты этпос 3 хоталэт округ Дума рүпитаңкв ывылтахтаме пасныл 20 талэ төвлү. Ты талыт сыс ат щёс тув депутат махум округувт олнэ мир пёриялыс.

Ань рүпитан депутат руц латңыл тох лававет – пятый созыв. Тән 2015 тал маньполь этпос мус рүпитэгыт. Тувыл ос йильпи пёриян вәрмалы тах вәраве. Хус тал сыс вәрум рүпатаныл урыл потыртан магыс ляххал тотнэ хотпат палт тит кұщайг ёхталасыг: Александр Сальников ос Сергей Дегтярев, тән сас округ Дума кұщай ваңыг хумыг рүпитэг.

Тән лавсыг, ань тананылн рүпитаңкв кұпнитнүв. Дума хунь рүпитаңкв уц ывылтахтас, тонт ты мак тарвитың олыс. Юи-ывыл талыт сыс тән хосат хансым сакконыт ёмашакв хансыяныл, федеральный сакконытн арталыяныл.

Тыи эрнэ рүпата тән таимагыс вәрияныл. Округувт матыр саккон хансаве, ос төва латңанэ лүольсаң те хансымат, ты саккон Москваныл ювле тетаве, эрнэ щирыл вос хансаве. Александр Сальников тамле пұмыщ вәрмалы урыл потыртас. Төва хансым сакконыт мирн сака ловиньтавет, ты урыл

савсыр мат потыртэгыт.

Хұрум саккон: этипалаг вина ул вос тыналаве, «губернаторский надбавкат» урыл ос няврамыт этипалаг кон ул вос хайтыгтэгыт – тән ты хұрум йильпи саккон пирмайта-маныл юи-палт мирв сака пұмщалахтұңкв патыс, ты урыл потыртаңкв патсыт.

Ань 37 хотпа депутатыг тот рүпитэгыт, халанылт пуссын кұщайг ат кос олэгыт. Ловиньтан нэпак хаснэ махум, спортсмен-хотпат, наука рүпата вәрнэ хотпат тән ётаныл ос рүпитэгыт. Ос тән халанылт савыңпалэ, вәим, ма-вөй нөх-винэ матт рүпитан нефтяник-хотпат.

Ялпың хоталаныл кастыл тән хосат тагыл щёпитахтэгыт, вәрнэ рүпатаныл урыл тина пөслувес, савсыр нэпакыт тах таратавет. Ты хус тал сыс округ Думат рүпитама ос ань депутатыг олнэ махум пуссын Ханты-Мансийск үсн мүйлуңкв тах вөвавет.

**Валентина
БАСИЛЬЕВА**

Кол магыс ойтхатнэ тэла



Маньполь этпос Ханты-Мансийск үст Общественный палатат рүпитан махум сапрәни вәрыгласыт, тән тот жилищно-коммунальный вәрмалит урыл потыртасыт.

Округянытыл савсыр маңыл пуссын аквёет налыманкем кұщай хотпа тыг ёхталас. Общественный палата кұщай Любовь Чистова лавнэтэ щирыл, кол магыс олн ойтнэ ос колыт ёмашакв щёпитан тэлатыт сав вәрмалы олы. Савыңпалэ махум ты урыл нэматыр ат вагыт. Таимагыс ты сапрәнит кұщай нэ ёхтум махум мак тарвитың вәрмалит урыл потыртаңкве лавсанэ.

Ань ты накт махум вәтихал кол магыс ойтхатнэ вәрмалы урыл китыглахтэгыт. Манасавит олн ос маныр магыс ойтаве, ты урыл ЖКХ департамент кұщай Марат Юсупов потыртас. Тав лавыс: «Округувт савнакпа колт газ, сыстам вит, кол палтыглан вәрмалы урыл ЖКХ департамент лөпсыт пус-

сын хансым олы. Нән интернет хосыт сунсункве вөрмегын.

Ань ЖКХ департаментыг региональный фонд рүпиты. Тув савнакпа колыт хотщёпитан магыс олн таставе. Тувыл ань кол магыс ойтхатнэ вәрмалы акваг уральтым оньшаве. Тынэ арген нөх ул вос алмаве. Махум норматив щирыл ойтхатэгыт. Тох ат ке кәсашегыт, колытт счётчик унт-тұңкве вөрмегын. Ты хосыт туп эрнэ савит олн ойтұңкве патэгыт».

Тувыл ань ос тамле йильпи программа щёпитавес: 2016 тал мус рүпата лүольсаң вәрнэ ЖКХ компаният арыгтаптавет тах. Ты рүпата мөт ёмас компаниан миве. Ань ты тэлат элалы акваг мұсхалыг щёпитаңкве патавет.

Николай МЕРОВ

ЛЯХХАЛЫТ

Тал сыс сав ёмас тэла вэрвес

Молты тал губернатор Наталья Комарова «Год информационной поддержки добрых дел» намайстэ. Ань махум вэрвес ёмас тэланыл журналистытн тара-паттувэсыт. Тувыл олывлаттал ос номтыңыг вэрим тэлат урыл ёмшаквег хаснэ журналистыт мүйлупсал майвэсыт. Ты 2014 тал губернаторув «Год доброй воли в Югре» намтуңке лавыстэ.

Ты тэла хумле щирыл элалы вэрвесе, хоты хотпат ты вэрмалитыт рүпитэгыт, пуссын ты овылтыт журналистыт элы-палт Ирина Максимова потыртас, тав общественный палатат рүпиты, ныврамыт ос маньлат махум акван-нётхатнэ ассоциацият кұшаиг олы.

Ирина Ивановна лавыс: "Ань "Добрая воля" вэрмалыт махум танки тэланыл касащан щирыл вос вэрияныл. Тот хотпа нэмхотьютн ёрвагыл матыр вэруңке ул вос кашилтаве. Касың хотпа такви вос пэрии, хот, манхурип тэлат тав махумн нётуңке паты. Тувыл савсыр нётмил вэрнэ тэлат мән мұсхалыг ханищтасанў ос «Зажги свою звезду» наппа проект щёпитасу. Тот ат направление хосыт рүпитаңке рөви.

Овыл вэрмалы "Равный - равному" намай олы. Тот маньлат махум яныгпала хотпат ёт акван-нётхатым рүпитаңке вёрмэгыт. Китыт тэла "Волонтерский всеобуч", тот махум матхурип ийльпи тэлан ханищтавет. Хұрмит ханищтап

«Info-добро» намтыслў. Мән ты сэрёр тэлат урыл махумн мак щирыл вос потыртасу.

Нилыт вэрмалюв «Я-доброволец» намтыслў. Тот касың хотпа такви ханыщулам наканэтыл мот хотпат вос ханищтанув. Ос атыт направление "Меценатство" намай олы. Тот коммерческий колыт савсыр тэлат вэрнэ магыс олн вос тастэгыт, тан нётмилыл минэ махманыл ёт аквёет элалы вос рүпитэгыт.

Ань пуссын ты ат тэлат акван-ёхтэгыт. Ос мән аквёет юрщактым матыр вэруңке ке патэв, тонт рушит лавнэныл сосув пеламлы ос касың вэрвес тэланув элалы миргантаңкв патэгыт.

Тамле рүпатат округ янытыл лашал вэруңке патвэсыт. Ты тэлат матыр пұмшалаңке таңхегын ке, нан общественных ос внутренних связей департамент ос образование, маньлат махум ёт рүпитан департамент ищхипың лопсыт ляххалыт тах кинсэ.

**Тамара
МЕРОВА**

Мә-вōй нōх-винэ мәхум нётэгыт

Молал «Лукойл – Западная Сибирь» мә-вōй нōх-винэ компания мән редакциявн тамле латың кетыс. Тан «Югра лылыеп» общественный организациян нётмил вэрсыт, 5 миллион солкōви мисыт. ОАО «Лукойл» компаният ос округ Правительстват рүпитан махум халанылт соглашение-нэпак хансым оныщэгыт.

Ань ты олнытыл сосаң махманув магыс съездыт, конферен-

цият, координационный советыт ос ялпың хоталыт щёпитаңкв патавет. «Лукойл» компания ос «Югра лылыеп» организация хосат тагыл аквёет рүпитэг. 2010 талныл соглашение-нэпак хосыт тан пуссын аквёет 25 миллион солкōви савсыр тэла магыс тананылн майласыт.

**«Лукойл» компания
кётум ляххал
маньши латңыг
Н. МЕРОВ хансытэ.**

Мир пусмалтан мәгсыл сав олн таставе

Касың сатыт Наталья Комарова, губернаторув, такви ваңын кұшай хотпанэ акван-атыглыанэ. Тот тан савсыр постановленият, распоряженият пирмайтэгыт.

Ос акв тамле сапрәни олме порат кұшаит мир пусмалтан вэрмалы урыл потыртасыт. Пирмайтым нэпак щирыл махум пусмалтан мәгсыл федеральный бюджетныл 163 миллион солкōви округувн миве. Мән округувт ты тэлан акв миллиард 269 миллион солкōви тах тасты. Наталья Комарова губернаторув лавме щирыл, ты олнытыл пұльницат савсыр ищхипың утыл ётвет. Тамле утыл сым агмыт, пувласпи агмыт ос мот тарвитың агмыт пусмалтаңкв рөви.

Владислав Нигматулин, округувт мир пусмалтан департаментыт рүпитан хум, лавыс, ювле хультум тал сыс тамле ищхипың утыл 7

сөтыра арыгкем хотпа тарвитың агманыл пусмалтавэсыт. Ос ты тал кастыл тастым олныл 8 сөтыра арыгкем элумхолас пусмалтаңкв товылхаты. Ос аквта порат кұшаит «Обосновах общественного контроля в РФ» наппа саккон урыл потыртасыт. Наталья Комарова лавме щирыл, ты саккон Государственный Думат хунь пирмайтэв, тонт махманув кұшаит уральтаңкв тах вёрмияныл. Общественный объединеният тамле рүпата вэруңке патэгыт. Ты саккон таймагсыл пирмайтэв, кұшаит танки рүпатаныл мұсхалыг вос вэрияныл.

**Людмила
ТЕТКИНА**

Акв сунпаттаң касыл

**Сочи ўст ағмың-мосың ос сакватахтам
Смәхум халт касыл миам юи-пәлт Хан-
ты-Мансийск ўст следж-хоккеил каснэ хум ёт
пресс-конференция вәрыгавес.**

Та хум наме Констан-
тин Шихов. Тав окру-
гунт следж-хок-
кейт каснэ мэхум халт
капитаныг пәриим олы.
Тав ётэ Эдуард Иса-
ков ос Александр Зы-
ков олсыг. Тән сас сак-
ватахтам мэхум кас-
нэ ширыл щәпитан
күщаиг рүпитэг. Ты ка-
сылт лаглыл ат ёмыгтан
мэхум ёнгёгыт. Тән акв
элмиң тәр сунпаттаң
сунын ұнттым ос ём-
щаквөг ёл-нәгса-
лахтым яңк тар-
мыл яласёгыт. Кәта-
нылт ос тит мән
клюшка пувим онь-
щёгыт, таияныл ёт ты
касёгыт.

Эдуард Исаков лавыс:
«Мән палтылув ты нам-
па касыл вәрим пәсныл

мощёртын ат тәлыг ты
ёмты. Мот хон мә ма-
хум палт тав хосат та-
гыл вәве. США хон
мәт тамле сыр хокке-
ил хөтпан нупыл ат
мәт касёгыт. Таимәгсыл
щәрыщ тапалт олнэ мәт
Россиат каснэ мәгыс
күпнитнув мэхум
пәрияңкв олыс. Мән
ос Россия мав янытыл
хөт мәт туп тамле ка-
сылн мэхум ханищтавет.
Сочи ўст касум мэх-
манув хосат акван-
атсанүв. Мән тананыл
ёмщаквөг вәганүв. Мән
каснэ мэхманув
нила тәл сыс сав алы-
масыт, ёмщаквөг щә-
питахасыт».

Тувыл следж-хоккейт
каснэ мак хум Констан-
тин Шихов потыртас:



«Ты касыл мәгсыл мән
күщаянув сав ёмас тәла
вәрысyt. Ам тананылн
яныг пүмашипа ләтың
лә-вөгум. Хунь ам шар
өвыл щёс ты касылн
вөввёсум, ам номсах-
тасум, манрыг ануи
тыи эри, ам сун тармыл
ўнлуңкв ат вөрмөгум,
ты коньпал иң ёнгункв
эри. Мощ ёнгимаи юи-
пәлт, ам торгамтаслум,
ты касыл тәл олупсам
тамле пүмшиг ат олнүв.

Ань ты Сочи ўст олум
касылн мән ётэ-хөталэ
сыс щәпитахасыт. Ты

касылт Россия мав
мәгсыл мән мәнтинә-
нув шар ат сәлитаса-
нув, щәлыгөлн тәр пөс
висүв».

Каснэ хум юи-пәлт
таве щәпитан хум
Александр Зыков по-
тыртас: «Соль, хунь мән
тув щәпитахтумув по-
рат, мәнтирот номсах-
тасүв. Мәнави элы-
өвылн хотты мән
те ёмтуңкв, ёмасыг
олнүв. Мә янытыл сав
ёмас ёр следж-хоккеил
ёнгын команда олы.
Аквёт нётхатым кас-
нэ мэхманув титыт
мә висыт».

Пресс-конференция
оигпан элы-пәлт Эду-
ард Исаков лавыс: «Мән
ань следж-хоккейт ён-
гасан мәгсыл иң тит
команда атуңкв ном-
сёв. Хотьют таквинәтэ
уральтаңкв кәсащи те,
звонитән, ёхталән».

**Александр
ВЬЮТКИН**

Хәпыт суссылтавёсыт

**Мощ мөлаалнув Ханты-Мансийск ўст олнэ
«Центр ремёсел» колт ййвныл сәгрим
ханты мәнхәпыт выставкат суссылтавёсыт.
Ты пүмаш Нягань ўст олнэ мәщтыр хум
щәпитәлыгастэ. Тав наме Сергей Константи-
нович Лукьянченко.**

Сергей Константино-
вич кәтыл хурит пөслын
хумыг такви ханищ-
тахтас. Ань ат тәлыг ты
ёмтыс, хунь тав өвыл



щёс ййвныл мәщ-
тырлаңкв өвылтахтас.
Мәнхәпыл каснэ
вәрмәл ёмталан порат
тав ханты мэхум яла-
сан мәнхәп сәгруңкв
номылматас. Нижне-
вартовский районт ол-
нэ сәлың кол хум Се-
мён Айпин палт хәп
вәрнэ ширыл ханищ-
тахтуңкв мианс. Шар
өвыл хәпе тит хөт-
паг сәт хөтал сәгрыс-
тән. Сергей Константи-
нович ханты хумн ма-
ныр ос хумус пасатаңкв
ос хөт эри сәгруңкв,
хүлтвес.

Та пәсныл тит тәлыг



ты төвлыс. Мәщтыр
өвыл вәрнэ хәпанэ
торың ширыл ат
әртмысыт. Хоты хәпе
сөви хартаве, мөтананэ
пәлыг-поклысыт, тувыл
такви сав хәп сака вөв-
таг сәграпәлсанэ. Ты ко-
ныпал тав иң сав савсыр
түп сәгрыс. Тувыл так-
ви номтанэ ширыл хо-
рамтасанэ.

2013 тәлт Сергей
Константинович хәпыл
щәпитым выставка-
тэ Москва ўсн тотыгла-

вес. Тот ат хөтал сус-
сылтапе рүпитан сыс ат
сөтыра ляпатем мэхум
тав палтылэ щалтсас.
Муй мэхум Сергей ёт
акваг потыртасыт ос
тав ётэ пөслахтасыт. Та
юи-пәлт тав тәра «На-
родный мастер России»
намыл пинвес.

Ань ос йильпи вәрум
выставкатэ Ханты-Ман-
сийск ўст суссылта-
ве. Хотьют кәсащи,
ялән, сунсән.

Александр АНЯМОВ



Соссаң нэт-хумит кассыт

Ювле хультум этпост Сургутский район Русскинская павылт сáлы ўрнэ, вóраян ос хўл алыщлан ханты ос ёрн мáхум ялпың хóталыл вáрыглавёсыт. Тамле вáрмалъ район ос пáвлың кўщаит акваг щёпитáлэгыт. Пáвылн ань сáвсыр мáныл мўй мáхум ёхталасыт.

Соссаң мáхум ялпың хóталаныл сáлыт хáйтнэ касылыл óвылтавес. Ты тáл сака сáв сáлың мáхум тув ёхталас. Русскинская, Нижний Сортым пáвлыгт ос ты ляпат вóрың мáт óлнэ хантыт ос ёрныт коньпал тув Белоярский район Нумто мáныл Пяк колтáгыл касуңкве ёхталас. Ань сáлыт óщнэ атпан хум хóтпат тáнки халанылт кассыт. Осянаскасылыт вáт сáвиткем нэ хóтпат касуңкве кáсащасыт.

Сáлың мáхум кит хóтпал аквторыг касуңкве вóвиньтáлвёсыт, ты э́лы-пáлт тáн нэпакн хансым óлсыт

ос вим номераныл щирыл лáкква-уртвёсыт. Касылт тóва хóтпат сáлыяныл тáра ёмáщакв нёвумтэгыт, товат ул хот-рохтэгыт, илттыг ювле та ёңхыгпёгыт. Мўй мáхум пўсас ос старт ляпат люлюңкват кос тáртвёсыт. Тáн тай хури пóслуңкват тув сака воратасыт.

Та щирыл матахмат каснэ хум ос нэ́квет сáлыяныл ювле ё́хсыт, тáн воссыг касуңкват вёрмысыт. Тох вáим люль, товат тапалыт мáныл Русскинская пáвылн ёхтысыт, ёмáщакв каснэ мáгыс щёпитахта-



сыт, тувыл вунщалыг та хультсыт.

Ты тáл хум хóтпат халт Александр Станиславович Лемпин, Нижний Сортым пáвылныл óлнэ ой́ка, нóх-патыс. Тав юи-пáлэт Владимир Иванович Сопочин óлыс, ос хўрмит места Геннадий Александрович Покачев вистэ.

Нэ хóтпат халт Русскинская пáвылныл Зоя Павловна Рускина нóх-патыс, китыт места Лидия Алексеевна Покачева вистэ, ос хўрмит местат Капитолина Ивановна Покачева óлыс.

Óвыл места вим хóтпаг "Газпром нефть" компания пáлыл "Бураныл" мўйлуптавесыг. Мóтаныт ос мóт сáвсыр ёрнэ пормасыл майвёсыт.

Китыткасыл "Бегвнациональной одежде" на-маим óлыс. Тот нэ́квет халт Виолетта Ивановна Сопочина нóх-патыс ос тав маснут поснэ утыл мўйлуптавес. Китыт местат Анастасия Анатольевна Компина óлыс, хўрмит местат - Кристина Евгеньевна Вылла. Хумит халт Леонид Борисович Комтин нóх-патыс, тав нáйив сартнэ утыл мўйлуптавес. Олег Вячеславович

Мултанов китыт места вис, ос юи-óвылт Валерий Кузьмич Кечимов óлыс.

Хум хóтпат суныт ўлтта óс поргысыт. Тот Валерий Кечимов сака сáв щёс порыгмас, тав юи-пáлэт Леонид Комтин óлыс, ос хўрмит места Виталий Рускин вистэ.

Нэ хóтпат халт маснут нётнэг юнтнэ касыл вáрыглавес. Тот нэ́квет тáнки юнтум тэ́лы маснутаныл мўй мáхум э́лы-пáлт суссылтасаныл ос тáнки мáщтыр рўпатаныл урыл потыртасыт. Та сыс хум хóтпат «Нюлтахли» касылт пёрщисыт.

Пáвыл кант ярмарка вáрыглавес. Ань соссаң мáхум тáнки юнтум пормасаныл, сáвсыр пилыт, сáлы нёвыль ос хўл тыналасыт. Ёрн-колыт тўщтыглавёсыт, мáхум тув щáй аюңкве, нёвлиң исмит тэ́ңкве ос нас исылтахтуңкве щалтсасыт. Хóтал палыт сáв мáныл ёхталам мир мўйлыс, тот кит финныг ос американец-хум óлсыт. Ос тáн уранылт ётылнуве тах хансэгу́м.

Тамара МЕРОВА



ХАНИЩТАП



А. Вьюткин вӱрүм хури

школат хаништахтӱг. Ойкатӱ Юрий Алексеевич мӱнӱщи хум, Сӱрахта нупыл хӱл алыш-лаҥкве ос вӱраяҥкве яланты. Туи порат тӱн щӱмьяҥ тагыл Мӱсыг пӱвылн ялантӱгыт, щӱщӱкватӱ кол уральтыяныл. Тот пил вӱтӱгыт, хӱл алышлӱгыт.

Нӱврамыт ханищтан нӱ

Сӱкырӱя пӱвыл школа

Хӱльӱс район Сӱкырӱя пӱвылт Хӱвыл классыт хаништахтан школа ӱлы. Та школат мӱнӱ нӱврам сӱдик рӱпиты. Сӱкырӱян ялмум порат ам тув щӱлтсасум, тот рӱпитан мӱхум ӱт хӱнтхатыгласум, потрамасум.

Кӱщай вӱҥын нӱ потре

Тамара Савельевна Ванюта кӱщай вӱҥын нӱг ӱлы, тав лӱвнӱтӱ щирыл, школаныл анӱ Саранпӱвыл школа нупыл паттувес, кӱщайныл Андрей Дмитриевич Попов.

–Школавт хӱрум нӱврам хаништахты - ӱвыл классыт акв нӱврам, китыт акв, нилыт ӱс акв нӱврам.

Тӱнаныл ханищтан нӱг Евгения Андреевна Гриценко ос Ольга Андреевна Ванюта. Мӱлты тӱл кит нӱврам хаништахтас, мӱтынтыг тах ӱс туп кит нӱврам хаништахтӱкве паты. Садикын ос лов нӱврам яланты.

Школавт аквхуйплов тӱл ты рӱпиты. Кит хӱтпа нӱврам хаништӱг, кит воспитатель садикт рӱпитӱг. Пуссын аквӱет мӱн

тыт сӱтхуйплов хӱтпа рӱпитӱв. Сӱвыҥпӱлӱ Саранпӱвылт ӱлӱв, кӱсыҥ хӱтал тыг рӱпитаҥкве та ӱхталӱв, пӱвлыг халӱн ат вӱрыста. Анӱ автобус яласы, тув тӱлматӱв. Хӱтӱют машина ӱнӱщи, тӱй кӱстырнуве, тӱнти яласӱгыт.

ӱрнӱ нӱпакыт, сӱвсыр ищхипыҥ утыт, та маныр пуссын ӱнӱщӱв. Кӱщайовн акваг нӱтавӱв, матыр ӱрмыгы, тав тӱра кӱтхаты. Ты тӱл садик мӱгыс сӱвсыр ӱнҥын утыт ӱвтает. Школавт рӱгыҥ, кӱре пӱлтыглым нила хӱтпа рӱпиты, тӱн пуссын Сӱкырӱят ӱлӱгыт, нӱвраманыл ты школан ос садикын ялантӱгыт.

Тамара Савельевна ӱги ӱпарищ наме Вьюткина, 1974 тӱлт самын патыс. ӱтӱтӱ Мӱсыг пӱвылныл ӱлыс, оматӱ ос Тутлейм пӱвыл нӱ. ӱкваг-ӱйкаг анӱ сас ӱтимыг. Увщи-тӱ Татьяна Савельевна щӱмьятӱ ӱт Ханты-Мансийск ӱст ӱлы.

Тамара Савельевна кит нӱврам ӱнӱщи. Ар-тӱм пыге онтолов классыт, Зина ӱгитӱ ос китыт классыт Саранпӱвыл

Евгения Андреевна Гриценко нӱврамыт ханищтым лов тӱл рӱпиты. Нӱн анӱ тав потре ловинӱтӱлӱн:

–Ты школат рӱпитаҥкве ӱнум сака мӱсты, аквӱет рӱпитан мӱхманум пуссын ӱмас хӱтпаквет, акван-нӱтхатым рӱпитӱв. Тыт анӱ хӱрум нӱврам хаништахты, кӱсыҥ классыт акв нӱврам. ӱрнӱ нӱпакыт ӱнӱщӱв, матыр-ӱти пуссын ӱлы. Хотты нӱпак ман матыр ищхипыҥ ут ӱрмыгы те, хасылтӱв, кӱтхатӱв, каникулыт сис тотавӱв.

Нӱврамыт мӱгсыл сӱвсыр конкурсыт вӱрыглӱв, халанылт касӱгыт, тувыл хӱтӱютаныл хоты мӱста вӱг, дипломытлы ос мӱйлупсатыл мыганӱв. Кол тӱвырт хаништахтынӱныл коньпал, мӱлтып хӱталытт тӱн кон ӱнгасӱгыт, физкультура урок порат ӱсал ос сунсовыл тахсӱгыт.

Ам Саранпӱвылт самын патсум. ӱтам анӱ пенсият ӱлы, омам пӱльницат рӱпиты. Пыг ӱнӱщӱгум, хӱтыт классыт хаништахты.

Анӱквам Анастасия Ивановна Сангилева, Няхлаҥ пӱвыл мӱнӱщи хӱтпа. Тав анӱ мӱн ӱтув ӱлы, палягӱтыл сака ат хӱлы, самага ӱс лӱль-



Т. С. Ванюта



Е. Е. Кропотова ос И. Е. Кустышева



Паша Кустышев ос Артём Филиппов

саң постѣг. Саранпавылт шар яныг хѳтпав ты, яныгполь ѣтпост 96 тѳлѳ тѳвлы. Нила нѳврам ѳньшиглас - хѳрум пыг, акв ѳги, тѳи ам омам. Пыганѳ пуссын ѳтимыт, омам тактѳт хулытыс.

Анѳ потрумѳн та оигпас.

Садикт рѳпитан нѳквѳг

Хурит ос садикт рѳпитан нѳг пѳслым ѳлѳг – воспитатель Елена Григорьевна Кропотова ос мѳнѳ лѳккар Ирина Германовна Кустышева.

Елена Григорьевна Ханты-Мансийск ѳст педагогический колледж ѳтлас, тувыл тѳра Сѳкырѳя садикн рѳпитањкве патхатас. Тав лѳвнѳтѳ щирыл, анѳ тув лов нѳврам яланты, пуссын ињ мѳнит, кит-хѳрум тѳл яныт нѳврамаквет.

Рѳпитањкве тавѳн мѳсты, ѳрнѳ матыр пуссын ѳньщѳгыт. Ёнгын утыт, нѳпакыт, телевизор, сѳвсыр ищхипыњ утыт, та маныр, пуссын ѳлы. Нѳврамыт тѳнutyл пѳйтавет,

тыттавет. Елена Саранпавылт олы, Сѳкырѳян тѳн анѳ автобу-сыл ѳхталѳгыт, тѳи порат ос хѳпыл яласањкве патѳгыт.

Елена Григорьевна Саранпавылт самын патыс, тот яныгмас. Омамтѳ ѳрн нѳ, ѳтѳтѳ мѳнѳщи хум. Тѳн анѳ сас ѳтимыг. Елена кит кањк ос увщи ѳньщи, тѳн щѳщѳкваныл палт яныгмасыт. Щѳщѳкваныл Евдокия Илларионовна Тальмич, ѳги ѳпарищ наме Рахтымова, Сѳкырѳя нѳ, анѳ Саранпавылт ѳлы. Елена кит нѳврам ѳньщи, пыге ѳвыл клас-сыт ханищтахты, ѳгитѳ ты тѳл школан мины.

Ирина Германовна ѳс Саранпавылт ѳлы. Сѳкырѳят рѳпитанѳтѳ лов тѳлыг ты тѳвлыс. Тыг патхатаме ѳлыпѳлт Саранпавыл пѳльницат мѳнѳ лѳккарыг рѳпитас. Анѳ тыт нѳврамыт ѳт рѳпитањкве тавѳн мѳсты, ѳрнѳ тѳрпи пус-сын ѳлы. Прививкатыл нѳврамыт Саранпавылт вѳравет. Сѳкырѳя пѳвыл – нѳтнѳ мѳнѳщи пѳвылкве, тыт ѳлуњкве тѳнанылн сака ѳмас, лылыѳпе сыстам.

Ирина Германовна



Максим Филиппов ос Е. А. Грищенко

Хѳльѳст самын патыс, хѳт тѳлѳ тѳвлуме порат щѳмѳятѳ Саранпавылн вантыс. ѳйкатѳ соссѳњ хум, совхозт трактористыг рѳпиты. Тѳн хѳрум нѳврам ѳньщѳг.

Яныг ѳгитѳн щѳмѳянѳ тѳгыл Саранпавылт ѳлы, пыгѳн Ханты-Мансийск ѳст медицинский академият ханищтахты. Мѳнѳ ѳгитѳн нила тѳлѳ, садикн яланты, мѳнѳщи лѳтыњ ханищты. Тот анѳ щѳнѳ лѳтыњ ханищтан группа ѳлы, ѳгирищѳн тув яланты, мѳнѳщи лѳтњыл сѳвсыр стихотвореният ханищты. Ирина Гер-

мановна мовинѳты, лѳви, тѳн анѳ юн тавѳн пуссын нѳтѳгыт, мѳнѳщи лѳтыњ аквѳѳт ханищтѳгыт.

Садикын щалтсамум порат, нѳврамыт анѳ хѳталѳятт тѳпѳяламаныл юи-пѳлт ѳлхуоптымат, ат та пѳслысанум. Школат рѳпитан мѳхум ос нѳврамыт тай мощ пѳслысанум. Ты ятил мѳнѳщи мѳхуматенув, нѳврамаквет пуссын пустагыл вос ѳлѳгыт, Нѳянылн-ѳтыранылн вос ѳргалавет!

Светлана
РОМБАНДЕЕВА

СОССАҢ МИР КУЛЬТУРА

«Үринэква хотал» янытлавес



Ювле хульгум сатыт Югорск үст «Үринэква хотал» янытлавес. Та үст сав тал «Суеват павыл» намба музей рупиты. Тот рупитан махум тан ты ялпың хотал варагылэгыт. Сатхуйплов верыстат ворт сав пёс кол унттым олы, ляпат Эсс намба я овты. Тот ты махум муйлысыт.

Та ёрт тўрыт, ят пуссын мањшыи нам оњщёгыт. Ам ялпың хотал олум порат яныгпала хотпат титыгласанум, ты я манрыг тох лававе. Тан лавсыт, мањшыи махум ты я тох лавсаныл – Пёс я. Ос рушит тан ты «Эссыг» лавуңкв патсаныл.

Та хотал сака малтыпыг олыс, хоталың. Сав мир музей олнэ ман ёхтала-сыт. Пёс колыт сунсыглым тыгле-тувле ёмыгтасыт, пёслахтасыт. Тувыл ялпың хотал та овылтавес. Югорск үс кўчай хум

Раис Закиевич Салахов атхатам мир нупыл потыртас, тав лавыс: «Үсувт олнэ мир ос ань тыг ёхтум муй махум! Тыхотал ман «Үринэква хотал» янытлылүв. Ты ялпың хотал хантыт ос мањшит тан янытлы-яныл. Ос мањавн, тыг мот мањыл ёхтум мир, тан пёс вярмаляныл, пёс ялпың хоталаныл ваңкв ос эри. Ман тан мањаныл тармыл олэв, таимагыс тыман пуссын тан ётаныл тыхотал муйлэв. Ань малтыпыг ты ёмты, тўя юи-палт туй ёхты.



Тыхотал нан ёмашакв муйлэн, ўщлахтэн. Нявраманын каснэ мат вос касёгыт, ат те хасёгыт, вос ханищтахтёгыт. Ман тыт олэв, мањавн соссаң мирыт культура-ныл ваңкв эри».

Тамле ты ёмас сымың латңыл ялпың хотал овылтавес. Элалы Нина Георгиевна Рукова потыртас, такви хансум стиханэ ловиньтасанэ. Махум йиквсыт, эргысыт. Тувыл пуссын каснэ ман воввёсыт. Хум хотпат, нёквет йивсуп пахвтысыт, халанылт хотють элнүв вуцкасытэ. Ляпат ос няврамыт кассыт, тан

сун ўлтта поргысыт. Мањнүв няврамыт ос нёпакныл ўринэква варауңкв ханищтавёсыт, тав магсылэ пити варсыт, хурит пёслысыт. Касың мат нёхпатум хотпат ос няврамыт пуссын янытлавёсыт, муйлупсал майвёсыт. Тувыл уц пуссын пасан ватан воввёсыт, соламатыл тыттувёсыт.

Ам та ёрн овыл щёс ялсум, мир хумус тот муйлы, мањшыи мањманув тот хумус олэгыт, ты урыл янас потрыт тах хансёгум.

**Валентина
ХОЗУМОВА**



Касум павылт салыл кассыт



Маньполь этпос овыл хоталэт Белоярский район Касум павылт салыл каснэ хотал вӑрыглавес. Та пумащ касыланыл ты тӑл «юбилейный» намтым ӧлыс, нӑлсӑт нупыл атыт щӑс вӑрыглавес.

Касум павыл махум тох лавӑгыт: «Салыл каснэ ийльпи, ӑмас ма щӑпитавес. Ты ӑлы-пӑлт тамле хотал Амня я титтыг-ӧвтнэ мӑт ӧлыглас. Ань ос павылыныл мощ алгаль-нуп ийльпи музей кол торыг салыт хӑйтнэ лӑҥх тӑйтӑ нянраг ӧл-ялыглым щӑпиталвес».

Сӑт щӑс порат салыҥ суныл каснэ махум салыяныл щӑ-питаҥкв ӧвылтасаныл. Каснэ лӑкв хосыт лӑҥх тӑра-паттын маҥ-сыл салыяныл нӑв-лыгласаныл.

Онтолов щӑс порат махум щӑмьяҥ

таҥыл тув атхатаҥкв ӧвылтахтасыт. Лов щӑс юи-пӑлт салыл каснэ вӑрмалъ та ӧвылтахтас. Яныг кӑҭаит салыҥ колыҥ махмытн яныт-лан латыҥ лавсыт.

Москва ӱсныл Леонид Яковлевич Симановский ӧхталас. Тав Российский Федерация Государственный Думат депутатыг ӧлы. Тав салыҥ махум янытлым лавыс: «Хунь ам тыг йинэ щирыл щӑ-питахтасум, ам ӧтум рӑпитан махманумн титыглавӑсум: «Наҥ хоталь минӑгын?» «Ам ман салыҥ махум кас-нэ лӑи ман минӑгум».

«Таи мань-сыр тамле касыл?». «Та касыл пӑс таҥыл вӑрыглаве. Ань хоталь минӑгум, тот нӑлсӑт нупыл атыт щӑс вӑраве. Ам тув ялмумт, тот ӑмас ном-тыл, сыстам сы-мыл ӧлнэ махум вӑсум. Хунь ман тӑн кӑстырыщ-нувӑг ӧлнӑныл

маҥсыл ийльпи сӑк-коныт пирмайтӑв те, ман пуссын тув тах ялуҥкв вӑрмӑв. Сун-суҥкв, мань-сыр ты каснэ хотал ос махум хумус тот ӧлӑгыт».

Хум юи-пӑлт Касум павыл миркол тармыл кӑҭаит ӧлнэ нӑ Алсу Касымовна Назырова такви павыл махманэ янытласанэ. Тав лавыс: «Касум павылт ӧлнэ салыҥ колыт яласан махумак-вет, ам нанан ты ӑмас каснэ хоталыл яныт-лыянул. Округув яны-тыл салыҥ махманув халт нан шар ӧрыг ӧлӑгын. Ман павлувн сӑв маңыл мир ӧх-талы, тӑнанылы ман ӧлупсав пумащ. Ӑпанын - ащӧйканын ӧлуп-саныл ӧлаль тотнӑн маҥсыл нанан яныг пумащипа латыҥ лавӑгум».

Ханты-Мансийск ӱсныл ӧхталам нӑ Татьяна Петровна Колетова сценан ӧс вӧвинь-тӑлвес. Тав округ яны-тыл ма-вит ӱргалан Департамент колт специалистыг рӑпиты. Махум янытлан лӑтґанэ ты: «Нан палтылын ам мӧт вӑрмалянул щирыл кос ӧхтысум. Анумн Белоярск ӱст ань рӑпитаҥкв кос ӧрыс. Хунь ам титыглавӑсум: салыҥ суныл касыл суснэ маҥсыл Касум павылыл ялӑгум ман ӑти, ам хоса ат номсах-тасум, тӑра кӑсашасум. Анумн ты касыл са-ка мӑсты. Таимӑсыл ам вӑрмынӑм щирыл порат тыг акваг ӧх-талаҥкв патӑгум».

Тав юи-пӑлт Степан Антонович Кечин-мов салы ӧщнэ махманэ

янытласанэ. Тав округ янытыл ӧлнэ салыҥ махум халт президен-тыг ӧлы.

Ӑвлӑт тав такви ханты лӑтґыл махум янытласанэ. Тувыл лавум лӑтґанэ руш лӑт-ґыл потыртасанэ.

Махум ат сӑвсыр ка-сылытт кассыт. Салыя-ныл «рысь» ос «мах» нампа хӑйтыл тӑр-тым, тувыл сун тӑр-мыл лӑюлим, ӑса ма-сым салыяныл юи-пӑлт пувумтахтым ос сун товиль тармыл ӱнлым кассыт.

Музей кант хӑрум ӧрнкол тӑшттым ӧлыс. Коланылт мӑй махум пӑйтым атыҥ нӑвлиҥ исмит ос исум щӑй ай-сыт.

Кон ос тыншаҥ сув нумпӑлн рӑпуҥкве, сун ӱлтта поргуҥкв ос акв торыг тит лӑглыл хӑрум щӑс ӧлаль по-рыгмаҥкв рӧвыс, тамле касылыт вӑрыглавесыт. Махум тӑнти ӧраныл тот ӧрталасыт. Нӧх-патум махум сӑвсыр мӑйлупсал мӑйлуп-тавӑсыт.

Салыҥ махум халт «на рысь» каснэ мӑт Николай Тасьманов нӧх-патыс. Салыяныл султыл миннэ Михаил Молданов ӧвлӑт ӧхтыг-пас. Сун тармыл нӧх-лӑюлим Иван Попов сӑртын ӧхтыс. Сун то-виль тармыл ӱнлым ӧс Михаил Молда-нов сӑртын ӧхтыс. Ӑса масым касылт Александр Тасьманов нӧх-патыс.

Округ салыҥ махум халт шар ӧрыг Юрий Кузьмич Тарлин пӑ-риявес. Ханты-Ман-сийск ӱст «Кубок Гу-бернатора» нампа мӑйлупсал тав майвес.

**Александр
ВЬЮТКИН**



Тав яласам лёнхе хосыт махум ёсал хайтсыт

Хальүс районт «Лыжнёй Андрея» намба касыл олыс. Няврамыт ос маңылат хөтпат Саранпавылныл Кульпас мус ёсал хұрум хөтал ёмсыт. Акв эт тән Хорыңпавылт хулсыт, мөт эт Лопмус павылт.

Ты тал 26 элумхөлас ёсал ты лёнхыл минасыт. Тамле пұмаш касыл Андрей Яковлевич Хатанев тав вәруңке номылматас. Маңыщи хум Саранпавыл школат няврам хаништан хумыгрүпитас. Тапасныл сав тал ювле хулытыс, Татьяна Степановна Гоголева ёсал хайтнэ тәла нөх-вормалтаңке номылматастэ. Овыл щёс Саранпавылт өлнэ махум 2009 тал Кульпас мус минасыт.

Татьяна Степановнан Олег Хатанев нёты, ты Андрей Яковлевич Хатанев тав пыге. Тав өсәтятэ хольт каснэ вәрмалыщирыл рүпиты. Олег ты рүпата урыл тох лавыс: «1960-1980 талытыт

Саранпавылт өлнэ махум касың тал Кульпас мус ос ювле ёсал ялсыт, ты лёнх палытэ 120 вёрыста. Аквнакт Кульпаст ос Лопмуст өлнэ махум Саранпавылн ёсал ёмсыт.

«Югра-Мегаспорт» намба организациан ос Татьяна Степановна Гоголеван ам яныг пұмашипа латың лавёгум, касың талтыкасыл вәруңке нётэгыт».

Елена Савчук, Кульпаст өлнэ нэ, ты тал овыл щёс ёсал ёмыс. Тав лавыс: «Овыл хөтал мән Саранпавылныл Хорыңпавыл мус минасүв. Ты павыл мус 40 вёрыста. Китыт хөтал Лопмусн ёхтысүв. Тасәвит вёрыста ёсал



хайтуңке, ам мощ вәгтал патсум».

Махум халт шар яныг хөтпаг Иван Вокуев олы. Тав ос мөт махум ёт ёсал хайтнэ ты касыл щёпиты. Тав лавыс: «Мән Андрей Яковлевич ёт школат аквёет рүпитасмән. Төнт тав ты рүпата вәруңке овылтастэ. Матёмас ань тав пыге ос мөт махум тав овылтам тәлатэ элалы тотыяныл ос няврамыт акванатыгыяныл. Ам амки ос сав тал няврамыт ёт рүпитасум, 70 талум төвлыс, хаништан пыганум акваг ам палтум ёхталэгыт, тох ам каснэ вәрмалюм урыл ат ёрувлэгум».

Алексей Хатанзев Саранпавылт «Поиск» намба центрыт няврамыт ёт рүпиты. Тав лавыс: «Няврамыт ёт мән ёсал акваг хайтыгтэв, халуvt касэв.

Тыи магсыл акв павылныл мөт павыл мус минуңке мән пуссын вөрмөв.

Ам Иван Николаевич Вокуевын яныг пұмашипа латың лавёгум. Тав маңав маңытагыл ёсал хайтуңке хаништастэ. Тав палтэ ялантан няврамыт пуссын ёмас хөтпаг яныгмасыт, товат МЧСыт, товат най харыгтан хөтпаг, лёккарыг, няврам хаништан колт рүпитэгыт».

Кульпаст ёсал ёхтум хөтпат пуссын павлың махумн үрвёсыт. Мүй махум магсыл тән ялпың хөтал вәрсыт. Ос аквта порат Саранпавыл музейт рүпитан хөтпат «На горных ветрах времени» намба конференция вәрыгласыт.

Н. Анадеева
кётум потре
маңыщи латңыл
Л. Теткина хансытэ



Н. Анадеева вәрум хурит

Хәңлә ос Лөпмус павыл махум

Хальүс район Саранпавыл ялмум порат ам акв мәнъщи щәмья эт хөнтхатыгласум. Дмитрий Николаевич ос Татьяна Васильевна Ивановыг нила нйврам янмалтэг. Нән ань Дмитрий Николаевич потре ловиньтэлын:

– Ам Саранпавылт самын патсум, 1977 талт ват сәграпнал этпост. Мән щәмьявт ат нйврам олыс, ам шар яныг. Виктория эщум ос тыт Саранпавылт олы. Мәнънүв эщагум, Людмила ос Рая, Югорск үст олэг. Виталий апщив атимыг емтыс. Омав Прасковья Дмитриевна, аги опарищ наме Сайнахова, ос хосат хотталы щалтыс. Мән яглаумн янмалтавесүв, Виктор Семёнович Егоров. Тав ты мән Волгоград үсныл ёхталас, нёрт рүпитас. Омам эт тыт акван-хөнтхатсыг, акван-минасыг, ам тонт маниг олсум. Яглаум ос атимыг емтыс.

Анёквм Лукерья Дмитриевна Сайнахова Хәңлә павылныл олыс. Тән ащойкам эт нила нйврам оныщигласыг, хұрум пыг ос акв аги, ты мән омав. Тән Хәңлә павылт яныгмасыт. Анёк-вагум-ащойкагум тән-ти нйвраманән коныпал, кит савалап нйврам янмалтасыг, Артеев агиришиг-пыгришиг, Миша ос Лида. Тән щәнягән-ащәгән саран нэг-хумыг олсыг. Нйврамыт пуссын аквёт яныгмасыт. Михаил Тюмень үст олы. Лида ос Хальүст, ойкатэ щирыл ань мот опарищ намыл олы.



Омам яныг ягыге Николай Ванзеват павылт олы, Василий Хальүст олы. Семён каңке Ямал мат олыс, кит пыг янмалтас. Хотталы щалтме атах талыг ты емты.

1979 талт анёквм колэ найн нөх-ёсвес, кипятильникул вит исылтас, тувыл хотмус нөх-хораяс. Тонт ам тал арыгтем туп олсум. Тав аном кон тотыгпастэ, ань документанэ магыс аквтув ювле щалтапи, тонт та алпитэ янытэт найн котаравес. Овлэт Хальүс пүльницан тотыглавес, тувыл Вася пыгән Тюмень үсн тотвес. Тот ос мощ пусмалтавес, тох иң нөх ат вёрмхатас, кит саттем туп олыс, атимыг та емтыс. Анёквм, лавёгыт, сака таксар нэ олыс. Тамле нак ат те емтыс, улпыл хоса олнүв. Коланыл я вата нупыл үнлыс, ань та мат мот кол үнлы, тот рүт махманув олэгыт.

– **Дмитрий Николаевич, экван хотыл олы?**

– Эквм Татьяна Васильевна, аги опарищ наме Чалданова, Лөпмус

павылныл олы. Мён нила нйврам оныщимён, яныг пыгмён ты тал овил классын минас. Китгагмён садикын ялантэг, шар мән агимён сатыт этпосэ туп товлыс.

Ам кол үнттын мат рүпитэгум. Төванакт хул алышлаңкве ман воряңкве Лөпмус нупыл ялантэгум, Тораст вөркол оныщегум. Ты таквсы хул мощ пувсув, уйсов ань тай шар тынталыг емтыс, сака ат китыглаве.

Ань потрумён та оигпас. Дмитрий Иванович щәмьятэ эт танти колтөлэгыт. Экватэтамле емас нэ, юн акваг матыр колсору рүпата вәри, посхаты, тәнүт пайты. Ам Татьяна Васильевна китыгласум, хөт самын патыс, элалы ань тав потре ловиньтэлын:

– Ам Лопмус павылт самын патсум, яныгмасум. Тот ань омам олы, наме Маргарита Геннадьевна. Мән щәмьявт ат нйврам олсув. Надя увчим щәмьятэ эт Кульпаст олы, Василиса эщум

ос щәмьяныг емтыс, ойкатэнтыл хұрум нйврам оныщег, Лөпмуст олэгыт. Атяв Василий Степанович клуб колт рүпитас. Та порат, 1985 талытт, Лөпмуст пёс клуб кол үнлыс. Атяв тув савсыр инструментит манос ёнгын утыт хасылталыс. Мощ ётылнүве клубын тотыглавёсыт. Махум ань ты хөтал мус номияныл, лавёгыт, тән клубт татем ушлахтасыт, эргысыт, ёнгасасыт. Атяв ос каңкагув-апщиягув атимыг емтсыт.

Омав ань юн тактёт олы, апыгрищанэ тав палтэ акваг хайтэгыт, анёкваныл эруптыяныл. Кит мис оныщи - акв поснэ мис, мотанэ иң мән. Туи порат пум вәри, агиягән-вәпсагән нётаве.

Ты ятил мәнъщи щәмья пустагыл вос олы, нйврамыт сотыңыщ вос яныгмёгыт. Наянылн-Отыранылн вос үргалавет! Пус кат, пус лагыл!

Светлана
РОМБАНДЕЕВА

Мāньщит – мā сым мāхум

«Торум Маа» музейт Светлана Динисламова (Садомина) щёпитам суссылтапе рўпитаңкве օвылтахтас. Мāньщи нē такви рўтанē наманыл Алгадьевыт, Садоминыт, Новьюховыт (Носкиныт) ос Кугиныт акв яныг нēпакн хассанē.

Өвлѣт выставкан ёх-тум мāхум элы-пāлт Светлана Астапович, «Торум Маа» музейт рўпитан нē, лāтың лāвыс: «2008 тāлт мāн օвылт щѣс «История семьи в истории страны - след прожитой жизни» намба суссылтап вāрыгласѣв. Мўй мāхманув ты урыл сака пўмшалахтасыт. Тыхотал Алгадьевыт, Садоминыт, Кугиныт ос Новьюховыт (Носкиныт) хумус тāнки халанылт рўтыг օлѣгыт, тыт ловиньтаңкве рѡви. Светлана Селивѣрстова такви рўтанē урыл вāрум суссылтапе «Люди сердца Земли» на-маятē.

Тамле нам тав Савелий ѣргум ѣргѣтыл вистē. Савелий Сотам лāвыглас: «Пѣс порат сараныт мāньщит вогулыг ос вѡрт օлнē мāхмыг лāвыгласаныл. Мāньщит – Мā сым мāхум, тāн Мāлтып

мāныл тыг ѣхтысыт, хѡт мā киттыг-ѣртвес». Ты лāтың «Паша рума» Николай Михайлович Садомин нēпакѣт хансым օлы.

Светлана ты рўпататē 1995 тāлт вāруңкве օвылтастē, тѡнт ома-тē Татьяна Романовна Садомина (Кугина) такви рўтанē урыл по-тыртас. Тāн урыл лāтың кинсым, мāньщи нē Хāльѣст օлнē архивын ялыс, тот рўпитас. Интернетыт «Мемориал» намба архивыт хѡнт-лум рўтанē урыл лāтың хѡнтыс. Тот хансым օлы, хѡт тāн хѡнтласыт, хунь порславѣсыт ос хоты мāт ѣл-щѣ-питавѣсыт. Светлана ты рўтанē кинсым Хулюмсунт, Саранпāвылн, Кульпасн ялыс, тот օлнē мāхум ѣт хѡнтхатыглас.

Ты юи-пāлт тав яныг таблица-капай вāрыс, тув акв сѡтыра арыг-кем рўт мāхманē на-маныл хассанē. Тав нēпаке



щирыл нила щѣмья – Алгадьевыт, Садоминыт, Новьюховыт (Носкиныт) ос Кугиныт пуссын акв рўтыг օлѣгыт.

Светлана Селивѣрстова лāвыс: «Ты рўпата вāруңкве āнумн сака мўстыс, яныг пўмашипа лāтың āнумн нѣтум хѡтпатн лāвѣгум. Пѣс порат օлум мāхманум ос ань օлнē рўтанум пуссын акв нēпакн хассанум.

Таяныт таблица вāр-нэм сыс, торгамтас-лум – тасāвит рўт օньщѣгум».

Светлана āтятē Селивѣрст Семѣнович Садомин. Тувыл нē таи хѡнтыс, āтятē Алгадьев օлум. Селивѣрст Семѣнович мāнь нѣв-рамыг āщ тāл хуль-тыс. Ома-тē мѡт օйка вāрыс, мāнь пыгрищ ѣвщитѣн янмалта-вес. Мāнь Селивѣрст Мѣңквѣя пāвылныл Кульпас пāвылн օлуңкве тотвес. Садоминыт таве тāнки օпарищ намыл хассаныл, тох Селивѣрст Садоминыг патыс.

Тав кāркамыг ос ѣмас хѡтпаг օлыс. Война по-рат хѡнтлас, Берлин ѣс мус ялыс. Яныг хѡнт оигпаме юи-пāлт нē тотыс, ѣкватѣнтыл сāv нѣврам янмалтасыг. Му-зейт тав ѣсгын нēпаканē, мāглын тагатан пѡсанē օс кāsалаңкве рѡви.

Людмила ТЕТКИНА



Сәлың колт рүпитан хум

Хальүс район Саранпавылт акв мәнълат
мәнъщи хум Яков Васильевич Ромбан-
деев ёт хонтхатыгласум. Тав такви өлупсатэ ос
сәлың колт вәрнэ рүпататэ урыл а́нумн потыр-
тас. Нән тав потре элалъ ловиньтэлын:

– Ам Хальүст 1989
тәлтсамынпатсум. Тонт
а́шум сәлыт урим
яласас. Ам самын
патмум юи-пәлт
китах этпос Саран-
павылт өщвесум, тувыл
сәлың колн тотвесум.
А́шум Саранпавылт
самын патыс. Тав
сәтхуйплов тәл яныт
порат сәлыт ўруңкве
нёрн ми́нас. Тот рү-
питы́матэ, такви су-
ныт, ёсат, матыр-а́ти
мәщтырыг вәруңкве
хани́штахтас. Тувыл
1995 тәлт сәлың колт
рүпитаңкве пөйтсас.
Саранпавылт йиль-
пи кол ўнттыс, павы́лн

өлмыгтас, плотникыг
рүпитас. Та сьс акваг
сәлың колн минуңкве
таңхыс. Кәсың таквс
пәвлүвт сәлыт нёвлиг
вәрнэ порат, тав ос
сәлыт нуим тот рү-
питас. Ётылнүв колэ
а́стластэ, ос ювле сәлың
колн рүпитаңкве пат-
хатас. Овлёт атыт бри-
гадат рүпитас. Тонт
тот сәлы мощща о́лыс.
Таимәгыс та́н нилыт
бригадан акван-түл-
вёсыт. А́шум тот кў-
щаиг паттувес. Ань ты
мус тот рүпиты.

Ам Саранпавыл шко-
ла а́стламум порат,
элалъ хани́штахтуңкве



номтум шар ат патыс,
сәлың колн рүпитаңкве
воратасум. Хани́щ-
тахтамум порат туп
ўщлахтын хөталыт
ёмтэгыт, тәра сәлың
колн тотвёсум. Онтолов
класс мус хани́штах-
сум, воссыг ат вёрита-
сум, сәлың колн та
минасум. Ань а́шум
ёт аквхуйплов тәл
рүпитэ́гум. Мән бри-
гадавт нёлолов пастух-
хөтпа о́лы. Пуссын
аквёет кит сөтыра
атсәт сәлы пуңк а́ня
о́ныщёв. Ань амки ат-
хуйпловкем сәлы о́ны-
щёгум.

Мән колта́глүвт ат
ня́врам яныгмасу́в.
Яныг ўвщим а́нь Хан-
ты-Мансийск ўст о́лы.
Котиль увщим ос
а́пщим Ханты-Ман-
сийск ўст хани́штахтэ́г,
мәнъ ййгри́шум и́ң
Саранпавыл шко-
лат хани́штахты. Та́н
сәлың колт о́луңкве
ат кәсашёгыт, ам туп
щә́нягум-а́щагум вәрнэ
рүпататэ́н элалъ тоты-
лум.

Сәлыл каснэ вәрма-
лин мән тўя́г щё-
питахту́нкве о́выл-
тахтэ́в. Хоты сәлыт
тәксарну́вет, пёлпы-
ңыщ хәйтэ́гыт, таит
выгану́в. Ам сунумн
ат сәлы кёре́гум: нила
сәлы сун хартым
хәйтэ́гыт, акв сәлы -
пөхыт лы́пашиг хайты.
Тав таимәгыс лы́пашиг
кёра́ве, сүлтыл ул вос
мины. Ты сәлы вожа-
кыг лә́ва́ве. Таве атах-

кем тәл хани́штаңкве
э́ри.

Пөхыт пө́сумта́лы-
лын, ёмаспал нупыл
хәйты. Квә́лге ювле
мощ пө́сумтылын, тав
вө́ртыпал нупыл ми́ны.
Састумы́г ювле харты-
лын, ёл та лю́ли. Сун
хартнэ сәлыт таве ты
хү́нтлэ́гыт.

Мә́щтыр хөтпат ка-
сыл ма́гыс сәлы су-
ныт вө́втаг вә́рияны́л.
Тә́лы порат хә́ль ййв-
ны́л вә́рим сун ёмас.
Тамле сун кў́пнит ос ём-
шакв лакви. Каснэ порат
сәлыт мо́лях хәйтэ́гыт.
Саква́ланэ́тэ порат со́пас
сун ёт акваг о́ныщёгыт.
Тўя́г ос хө́втыл вә́рим
ййв суны́л яласэ́в.

Яков Васильевич
сәлың колт яныгмас.
Сәлың суны́л мә́щты-
рыг яласы. Саранпа-
вылт каснэ вә́рмаль
о́лыглан порат сә́в щёс
призы́л майлу́вес. Ты
рү́питан ма́тэны́л вос-
сыг нәмхотта́ль ми-
ну́нкве ат та́ңхи.
Рү́пататэ ма́гыс кәсы́ң
э́тпос ёмас сә́вит ол-
ны́л ойта́ве. Ў́щлахтан
хө́таланэ́ порат павы́лн
ёхталы.

Ам ты мәнълат
мәнъщи пы́гын ос
тав рү́танэ́н пу́ста́гыл
о́лнэ ла́тың кё́тэ́гум.
Олу́псаныл кў́пнитыг
вос о́лы, колта́гланы́л
сө́тыл вос пина́ве. Сә́в
тә́л шуни́ңыщ э́лалъ
о́лэ́н. Най-О́тыраны́н
вос ў́ргала́вэ́н!

Николай МЕРОВ





Людмила Сенгелова



Татьяна Юмина



Татьяна Петрова

Тāн пēs вārмалитыл пūмщалахтĕгыт

Ма́ньполь этпос 27-29 хõtаланэт Ханты-Мансийск уст «Ремёсла и промыслы: прошлое и настоящее» на-па конференция рӯпитас.

Тамле конферен-
ция Ремёсла центрыт
рұптан м̄хум к̄асың
т̄ал в̄арыгл̄ыгыт ос
округ янытыл ̄олнэ
н̄яврамыт тыг в̄о-
виньт̄ал̄ыгыт.

Ты тәл нйврамыт
ос хаништан хөтпат
Хальүс район Хулум-
сунт павылный, Ок-
тябрьский район Та-
линка павылный,
Нефтеюганский рай-
он Салым павылный,
Сургут, Лянтор, Радуж-
ный, Нефтеюганск,
Урай үсытныл тыг ёх-
таласыт. Ханты-Ман-
сийск үст «Лучик»
няврам үргалан кол ос
«Лылың союм» нам-
па студиян ялантан
няврамыт тәнки докла-
даныл ловиньтасаныл
ос мастер-классыт сус-
сылтасыт.

Конференция օվыл-
тахам порат н̄врамыт
элы-пӀлт Тамара Ни-
колаевна Глушкова,
Сургутский универ-
ситетытт рӯпитан н̄,

лāтың лāвыс: «Кит хōтал сьс тыт рӯпитым, нāн халынт вāйхатэҕын ос хаништахтэҕын. Матьёмас нāн пёс йис вāрмалитыл пӯмшалахтэҕын ос элаль тотыянын. Ты мāгсыл кāсың нйврамын ам яныг пӯмашипа лāтың лāвөгүм».

Людмила Сенгепова
Лянтор ўсныл тыг ёх-
талас. Ханты āгириш
атыт классыт ха-
ништахты. Лянтор ўс
ляпат ѓлнэ хантыт ху-
мус тән вәрёгыт, та
урыл тав конферен-
цият потыртас. Ос ха-
ништапыт мāхум тән
вāруңкве хаништасанэ.
Людмила лāвыс, ома-
тэ мāщтырлаңкве сака
хāсы, салы тāныл сахи
ос мōт маснут юнты.
Тыи мāгсыл āгириш
тамле рўпата вāруңкве
ѓс ёмашакв хāсы.

Татьяна Юмина Сургут үсныл ёхталас, тав
ос сәлы тән махұм ёт

варыс. Татьяна օс атыт класкыт ханищтахты. Тав «Старый Сургут» намба центрын яланты. Тот маныщи хѳтпаи ныврамыт ѳт савсыр щырыл мащтырлѳгыт. Александр Дмитриевич Сайнахов ос Мария Владимировна Ситникова «Старый Сургут» центрѳт рупитан хѳтпаг, ѳгирищ мащтырлаңкве ханищтастѳн. Ты коныпал Татьяна «Лѳимѳ ханса» намба коллективѳт ѳрги. Тав маныщи ос ханты культурал сака пѳмщалахты, ты магсыл тамле конференциян ѳхталас. Ты рупата маныщѳт пѳс порат ос ань хумус вѳрѳгыт, тав та урыл доклад довиньтас.

Татьяна Петрова,
Октябрьский район Та-
линка пāвылт ълнэ āги,
мāхум сāвсыр сас хуса-
пыт вāруңкве ханищта-
санэ. Тав Галина Геор-
гиевна Сунгатова, таве
ханищтан хѳтпа, ѳт тыг
ѳхталас.

Галина Георгиевна
лāвыс: «Талинка пāвылт
культура центр рўпITY,

тот мӑн нӑврамыт ӗт
мӑш-тырлӗв. Аҫири-
шит-пыгришит ӗт
сӑсныл сӑвсыр хуса-
пыт вӑрӗв. Тамле уты
вӑрнӑ мӑгсыл сӑс мӑн
яҫк нӑтнӑ ӗтпос ос
лӑпта ӗтпос порат
нуыҫке ялантӗв. Ам
ты мӑт хосат тӑгыл
ӧлӗгум, мӑныщи, хан-
ты культурал сака
пӑмҫалахтӗгум. Тӑн
сӑсныл вӑрим сӧвтыт,
пӑйпыт хумус юнтӗгыт,
ӧс ӗмашакв вӑглум. Пӗс
порат руш мӑхум
ӑныяныл ӧс сӑсныл
вӑрсаныл. Рушит ос
соссаҫ мӑхум сӑсныл
вӑрӑм тӧва хусапаныл
аквхурипаг ӧлӗгыт.
Амки рушиг ӧлӗгум,
тыи мӑгсыл нӑн пӗс
йис вӑрмалянын хан-
ништыяным ос ӗлӑль
тотыянуҫ.

Мōт н̄врамыт кон-
ференцият й̄вныл
с̄авсыр а̄н̄щарыт
яктӯн̄ке, а̄канит ю̄н-
тӯн̄ке, р̄актыл а̄ны-
с̄аныт в̄арӯн̄ке ос мōт
щирыл ма̄щтырла̄н̄ке
хаништахтасыт.

Людмила
ТАСМАНОВА

Үсүн мир эргыт хунтлысыт

Маньполь этпос сыс Ханты-Мансийскат өлнэ махманув магыс сыресыр пумыщ накыт вэрыглавэсыт. Муй махум культура колн вэрыглавэсыт, ос тән тот матыр кас манос ёнгил суссыт.

Хотхуйпловит хоталт нэпак ловиньтан окружной колт «Литературные встречи» сапрани вэрыглавес. Тот махум Юрий Вэлла, потрыт хансум ёрн хум, каставес. Китхуйпловит щислат тав сатпан нупыл хотыт тэлэ товлынув, ос молты таквсы пувласпи люль агме магыс атимыг ёмтыс.

Нэпак ловиньтан колт Владимир Пшеничников ос Людмила Кипарис ёрн хум хансум стиханэ щирыл эрыг вэрысгыт ос эргысанэн. «Хотал» нампа ас-угорский махум театрыт рупитан хотпаг Альфия Абдрашито-ва ос Татьяна Огнева «Земля любви» Юрий Кылевич хансум потре хосыт мань спектакль суссылтасыт.

Тувыл сатхуйпловит щислат обско-угор-

ский институт нэпак ловиньтан колн сосаң махум вэрыглавэсыт. Тот «Музыка весны» нампа ушлахтан щёс вэрыглавес. Та хоталт Светлана Динисламова, потрыт ос стихыт хаснэ нэ, намхоталэ олум. Тав магсылэ ос мань концерт щёпиталвес.

Тот Татьяна Огнева Константин Меладзе «Оттепель» кина магыс хансум эрге, ос Белла Ахмадулина стихе щирыл «Снегурочка» эрыг эргысаге. Эрыгсовтаныт Вероника Кузнецован ёнгувэсыт. Ты коньпал Татьяна нётнэ турсуил Юрий Вэлла ос Андрей Тарханов, маньщи хум, хансум стиханэн ловиньтасаге.

Альфия Абдрашито-ва Светлана Селивёрстовна «Мама» хансум потре ловиньтастэ. Тав мань маньщи нэв сака



Татьяна Огнева ос Вероника Кузнецова

эсгыстэ. Лавыс, това потрыт ловиньтаме порат самвитанэ нэглэгыт, олупсавт өлнэ пищит такем ёмшаквёг ос ёрнэ латңыл хансавет, такем сымын хоёгыт.

Маньщи нэв вэрнэ тэланэ янытлан магыс Мария Волдина ос Владимир Енов ханты хотпаг ёхталасыт. Мария Кузьминична потрыт хаснэ сосаң хотпат урыл мощ потыртас ос акв эрыг эргыс. Тав урёт ам таи хансункве таңхёгум, ати сака хосат тав Екатеринбург үст «Поэзия» номинацият «Сердце поёт» таратам нэпаке магыс муйлупсал майвес.

Тот «Литературная премия Уральского федерального округа» нампа касыл вэрыглавес. Потрыт, стихыт хас-

нэ хотпат танки халанылт савсыр номинацият кассыт. Тот атхуйплов элумхолас нөх-патыс, тән ты янытлавэсыт. Тувыл «За вклад в отечественную словесность» янас премия Юрий Вэллаң щёпитавес.

Владимир Енов Светлана Селивёртовнан сав ёмас латың лавыс ос такви хансум поэматэ ловиньтастэ. Хулюмсунтынл ёхталам муй эква Мария Тихоновна Двинянинова нётнэ маньщи эрге эргыстэ ос такви катыл сагум төре Светланан муйлуптастэ.

Светлана Динисламова муй махумн ювле латың ос лавыс. Мотынтыг тав атпан тэлэ тах товлы, ос тав хансумстиханэ, потранэ щирыл обско-угорский театрыт рупитан хотпат матыр йильпи ёнгил щёпитанкве кусэгыт.

Культура тармыл рупитан хотпат янытлан хоталаныл ос олыс. Та кастыл махум В.И. Игошев музей-колн вэрыглавэсыт. Тот ос «Любовь и жизнь актрисы» пумыщ концерт суссылтавес. Татьяна Огнева, Софья Шесталова сыресыр пёс эргыт эргысыт, эрыгсовтаныт Ирина Плотникован ёнгувэсыт. Уст өлнэ махум ёмашакв ушлахтасыт.

**Тамара
МЕРОВА**



Тән С. С. Динисламова янытланкве ёхталасыт.

МУЙЛЫН ХОТАЛЫТ

Йильпи талн йильпи номтыл

Белоярский уст «Год культуры - 2014» нампа хотал вӑрыглавес. Та вӑрмалъ «Центр культур» нампа колт ӧлыс. Районаныл яны-тыл мащтыр ханты махум пуссын выставкан вӧвиньтӧлвӧсыт.

Тан тот тӧнти юнтум пормасаныл суссыл-тасаныл. Тув ӧхталам махум халт хотьютаныл кӧсащас, ӧс матыр мащтырлаңкв вӧрмыс. Тот совныл юнтыт тучаыт, нӧврамыт ӧщнӧ совъя вӧйт сӧсныл пӧйтым ӧльмыл хорам-тасаныл.

Та коньпал тӧрныл сӧвсыр ӧканит ос пӧс порат пуңкын пин-нӧ ӧква тӧрыт юнтсыт. Нӧврамыт халанылт ос туслы нампа пӧс ӧнгилыл ӧнгысыт.

Товат ос нарсьохыл сӧңквилтаңкв ханищ-тахтасыт. Тан Олег Потпот ханищтавӧсыт. Тав хуньт хосат ос Дмитрий Георгиевич Агеев палт ханищтахтас. Тувыл Ӑс-угорский те-

атрыт рӧпитас. Ань нӧврамыт сӧңквил-таңкв ханищтым ос нарсьохыл вӧрим акв-та «Центр культуры» колт рӧпиты.

Выставка тит щӧс ляпатем рӧпитас, та юи-пӧлт концерт вӧрыглавес. Концерт ӧвылтахтын ӧлы-пӧлт Белоярский район кӧщай хум Сергей Петрович Маненков вӧрум рӧпатаныл урыл потыртас.

Тав потре ӧлалъ ловиньтӧлын: «2013 тал сыс мӧн районув янытыл сӧв йильпи ӧмас лӧңх, ӧлнӧ ос ханищтахтын кол ӧнт-тысӧв. Вӧрум рӧпатав магсыл 4 млн. 196 сӧтыра солкӧви ойтым ӧлыс. Ӑнумн нӧн ха-



лынт ӧлуңкв пӧмаш. Ам кӧщайг рӧпитакв ӧвылтахамум пӧсныл мощӧрт ат-хойплов тӧлыг ты тӧвлы. Мӧлты тӧл Белоярский ӧсув округт щар ӧмас, сыстам ӧсыг пӧриим ӧлыс. Кӧсың ӧхтын тӧл мӧн ӧсув самын патнӧ нӧврамытыл сӧвми. Минам тӧл сыс пӧльницат 434 нӧврам самын патыс. Ам вӧглум, ӧсувт тан ханищтахтын мӧл пуссын тӧв-лавет. Хӧрум тӧлыг ты ӧмтыс, хунь мӧн ӧвыл щӧс ты урыл номсахтаңкв патсӧв.

Тувыл яныг пӧмашипа ам ӧлы мӧныл тыг ӧхтын махмытын лӧвӧгум. Тан тыг ӧлмыгтӧгыт, нӧматыр лӧль ат вӧрӧгыт. Та сыс тан акван-нӧтхатым юртыңыщ ӧлӧгыт. Кӧсың колн сӧв сӧт, сӧв шунь, сӧв тӧл пустагыл нанан ӧлуңкв лӧвӧгум».

Сергей Петрович потыртан мӧныл ӧстуме юи-пӧлт концерт та ӧвылтавес. Ӑргыт, йиквты суссылтан мӧгыс сӧв мир округ янытыл ӧхталас. Сака пӧмыщ ӧлыс.

**Александр
ВЬЮТКИН**



**Луима сӧрипос
(Северная зӧря)
№7 (1073), 4.04.2014**

Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция
Главный редактор –
Решетникова Р.Г.
Телефон (3467)33-36-82

И.о. заместителя главного
редактора – **Узель В.В.**
Телефон (3467)33-22-72

Ответственный секретарь –
Ромбандеева С.М.
Телефон (3467)33-23-09

Адрес редакции и издателя:
628011, г.Ханты-Мансийск,
ул.Комсомольская, 31
тел./факс (3467)33-17-52
E-mail: luima@ugracom.ru
Газета размещена на сайте
kmsn.admhmao.ru

Отпечатано:
ОАО «Издательский дом
«Новости Югры» г. Ханты-
Мансийск», ул. Мира, 46.

Подписано в печать:
по графику 19.03.2014 г.
в 15.00.; фактически
19.03.2014 г. в 15.00.
Индексы **04399, 54399**
Тираж **1750 экз.**
Заказ **1389**
Цена свободная
Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной
службы по надзору в сфере
связи, информационных
технологий и массовых
коммуникаций по Тюменской
области, ХМАО-Югре и
ЯНАО.

Свидетельство о регистрации
ПИ №ТУ
72-00795 от 23 января 2013г.